

PUDUT

Bala Ratnan Luk Pinudut

1 Kareb Allah nengimun mudut tana' idi amung-amung luk bang langit, ²idi tana' ineh na luk idi ayu idi na uang teh, idi dacem maput pa luun abpa'. Idi Roh Allah nesigio pa luun abpa' ineh. ³Idi Allah nepebala, "Do' inan acang." Idi acang pana' mangun. ⁴Idi Allah nenier acang ineh idi leh mawang niat. Idi leh nengatad acang ineh ratnan dacem. ⁵Idi leh neneten acang

1.3: 2 Kor 4.6 1.6 – 8: 2 Pét 3.5.

ineh "Maco" idi dacem ineh titenNeh "Malem." Pangeh ineh inan malem idi pekak, ieh ineh aco luk pun-pun.

6 Idi Allah nepebala, "Do' inan su luk pa luun abpa' ineh luk peringuned, pelé mabpat abpa' pad inan dueh babpat." ⁷Idi Allah nenganau' su luk pa luun abpa' ineh idi nengatad abpa' luk pa liang ratnan abpa' luk pa luun. Idi pangeh mangun mepad kudeng ineh. ⁸Idi Allah neneten su

luk pa luun abpa' ineh "Langit." Pangeh ineh inan malem idi pekak, ieh ineh aco luk kedueh.

9 Idi Allah nepebala, "Do' amung-amung abpa' luk pa liang langit ineh mepamung bang sebuleng luk inan, pad inan su luk tekering." Idi pangeh mangun mepad kudeng ineh. ¹⁰Idi Allah neneten su luk tekering ineh "Tana' ", idi abpa' luk nepamung ineh titenNeh "Abpa' Rayeh." Idi Allah nenier amung luk inau'Neh idi Ieh mawang niat. ¹¹Idi Ieh nepebala, "Do' tana' ngeruat uduh, irin luk inan ilung, idi puar-puar lawa luk kebua' luk inan ilung bang ineh, maya' ayudeh." Idi pangeh mangun mepad kudeng ineh. ¹²Idi tana' nengeruat uduh, irin luk inan ilung maya' ayudeh, idi puar-puar lawa luk kebua' luk inan ilung bang ineh, maya' ayudeh. Idi Allah nenier amung luk inau'Neh, idi Ieh mawang niat. ¹³Pangeh ineh inan malem idi pekak, ieh ineh aco luk keteluh.

14 Idi Allah nepebala, "Do' inan tuda'-tuda' acang bang langit, pad ngatad acang ratnan dace, idi mangun ku tanu' tuda'-tuda' kareb, aco, idi lak. ¹⁵Idi do' ideh mangun ku acang bang langit pad ngacang tana'." Idi pangeh mangun luk kudeng ineh. ¹⁶Idi Allah nenganau' dueh acang luk rayeh ineh, ieh ineh luk meluun rayeh luk

inan lalud kareb maco, idi luk isuut ineh luk inan lalud kareb medacem. Idi Ieh nenganau' amung-amung gituen pana'.

¹⁷Idi Allah nenganau' acang ineh bang langit pad ngacang pa luun tana', ¹⁸idi luk inan lalud kareb macang idi kareb medacem teh, pelé ngatad acang ratnan dace. Idi Allah nenier amung luk inau'Neh, idi Ieh mawang niat. ¹⁹Pangeh ineh inan malem idi pekak, ieh ineh aco luk keapat.

20 Idi Allah nepebala, "Do' amung-amung abpa' ngeruat mula' pudut luk inan niat. Idi do' inan suit-suit temulud arang gawa'." ²¹Idi Allah nemudut puar-puar pung luk mekara bang abpa' rayeh, idi puar-puar pudut luk inan niat luk amé' mula' bang abpa' ineh, idi puar-puar suit luk inan ilad teh. Idi Allah nenier amung luk inau'Neh, idi Ieh mawang niat. ²²Idi Ieh namaré peruan kuandeh, kebalaNeh, "Do' muyuh ngeruat anak idi iuk amé' mula' idi manu' abpa' rayeh, idi do' amung-amung suit pana' amé'-amé' mula'." ²³Pangeh ineh inan malem idi pekak, ieh ineh aco luk kelimeh.

24 Idi Allah nepebala, "Do' tana' ineh ngeruat puar-puar pung luk melayo idi puar-puar pung luk meliput, luk rayeh idi luk isuut teh." Idi pangeh mangun luk

kudeng ineh. ²⁵Idi Allah nemudut amung ineh, idi Ieh mawang niat nenier luk inau'Neh ineh.

26 Idi Allah nepebala, "Do' Tau mudut lemulun maya' ayu Tau, pelé ieh ngimet amung-amung lawid, suit, pung luk melayo, idi pung luk meliput, luk rayeh idi luk isuut teh." ²⁷Idi Allah nemudut lemulun ineh, maya' ayuNeh sebuleng. Idi Ieh nenganau' lemulun ineh mangun ku deléi idi decur. ²⁸Idi Allah nemaré peruan kuan didueh. Idi kebala Allah nedidueh, "Do' medueh mula' anak, pad inul medueh manu' tana' ini idi ngimet neneh, idi ngimet amung-amung lawid, idi suit, idi pung luk meliput, luk rayeh idi luk isuut teh." ²⁹Idi teh kebala Allah, "Ui maré nemedueh puar-puar pimara, idi puar-puar bua' luk miak kenem medueh. ³⁰Iamo' kuan amung-amung pung luk meliput, idi kuan amung-amung suit, Ui maré uduh luk miak kenendeh." Idi pangeh mangun mepad kudeng ineh. ³¹Idi Allah nenier anid-anid luk pinudutNeh ineh, idi Ieh pelaba awang niat. Pangeh ineh inan malem idi pekak, ieh ineh aco luk keanem.

2 Idi tana' idi langit pangeh pinudut. ²Idi bang aco luk ketudu' Allah nemande kekamenNeh. Idi Ieh nucu'. ³Idi Ieh nengeperuan aco luk ketudu' ineh idi nengelian neneh, ngaceku bang aco sineh Ieh nemande pudutNeh, idi nucu' ratnan kekamenNeh. ⁴Idi kudeng ineh tana' idi langit pangeh pinudut.

Kabun Eden

Kareb Tuhan Allah nemudut tana' idi langit, ⁵na luk idi uduh idi ilung luk mulun luun tana', ngaceku nateh Tuhan Allah nengebep uduh pa luun tana' ineh, idi nateh lemulun luk ngasa' tana' ineh. ⁶Iamo' inan noon remuat rat bang tana' luk ngeba' apat-apat tana' ineh.

7 Idi Tuhan Allah nenganau' lemulun ratnan abuh tana', idi Ieh nengiu pang icungneh, pad lemulun ineh inan niat, idi ieh mulun.

8 Idi Tuhan Allah nenibu aceh kabun déi' Eden luk pa busat aco. Idi déi' Ieh nenganau' lemulun luk pinudutNeh. ⁹Idi Ieh ngulung puar-puar kayuh luk do' siren mateh idi luk ngeruat bua' luk do'. Idi teh inan aceh kayuh luk titen lawa ulun

déi' uned kabun ineh, idi lawa ileh kali' luk do' idi luk dat.

10 Idi ratnan Eden ineh inan aceh abpa' luk manud ngeba' kabun ineh, idi rat su ineh abpa' ineh bibpat apat. ¹¹Idi ngadan abpa' luk pun-pun ineh Pison, ieh ineh luk mengelibut tana' Hawila, su luk inan amas. ¹²Idi amas ratnan tana' ineh pelaba do'. Idi teh inan umau luk do' buen idi batu luk meraga. ¹³Idi ngadan abpa' luk kedueh ineh Gihon, ieh ineh luk mengelibut tana' Kus. ¹⁴Idi ngadan abpa' luk keteluh ineh Tigris, ieh ineh luk manud amé' pa busat aco bang bawang Asur. Idi ngadan abpa' luk keapat ineh Pirat.

15 Idi Tuhan Allah nengalap lemulun ineh idi nenganau' neneh bang Kabun Eden ineh, pad ieh miak ngasa' idi ngimet ineh. ¹⁶Idi Ieh nengecuk neneh, kebala-Neh, "Iko miak kuman bua' lawa luk bang kabun ini pad pianmu; ¹⁷iamo' lawa ileh kali' luk do' idi luk dat ineh, aleg iko kuman bua'neh, ngaceku kareb iko kuman bua' ratnan lawa sineh, iko maté."

18 Idi teh Tuhan Allah nepebala, "Na do' lemulun ineh sebuleng mo'. Idi Ui pian nganau' kuanneh seburur rurumneh luk ngedengan neneh." ¹⁹Idi Ieh nenganau' ratnan abuh tana' ineh amung-amung pung idi amung-amung suit. Idi Ieh nemaré amung-amungdeh kuan lemulun pad kali' kudeng apeh ieh nganau' ngadan-deh. Idi anun-anun luk inau'neh ku ngadan amung-amungdeh, kudeng ineh teh luk mangun ku ngadandeh. ²⁰Idi lemulun ineh nenganau' ngadan amung-amung pung luk melayo, suit, idi pung luk meliput. Iamo' na luk idi rurum luk petulu ngedengan lemulun ineh.

21 Idi Tuhan Allah nenganau' lemulun ineh pelaba rudap. Idi laba' ieh rudap Allah nengalap sebuleng tulang sigarangeh, idi Ieh nemapen su ineh ku uang teh. ²²Idi ratnan tulang luk ilapNeh ratnan lemulun ineh, Ieh nenganau' seburur decur, idi Ieh nenguit neneh matun lemulun ineh. ²³Idi lemulun ineh nepebala,

"Idi nekini tulang ini ratnan tulangku. Idi uang ini ratnan uangku.

Idi ieh miak tetanen decur, ngaceku ieh pangeh rinuat ratnan seburur deléi."

²⁴Ngaceku ineh lemulun na miak na necan

taman-tinanneh idi pamung dengan awan-neh, idi didueh ineh mangun ku sebuleng burur.

25 Idi deléi idi decur ineh lubpa dengan na migu'.

Lemulun Mebpeh Bang Sala'

3 Idi meni-peh ineh meluun ileh ratnan amung-amung pung luk pangeh inau' Tuhan Allah luun tana'. Idi kebalaneh nan decur ineh, "Matuké Allah nepebala kudeng ini, 'Aleg medueh kuman bua' amung-amung lawa luk bang kabun ini?'"

2 Idi kebala decur nan meni-peh ineh, "Miak kai kuman amung-amung bua' luk bang kabun ini. ³Iamo' ratnan sebuleng lawa kayuh luk luun uned kabun ineh Tuhan nemebpeng nekai na kuman idi na ngakem bua'neh, pad kai na maté."

4 Idi kebala meni-peh nan decur ineh, "Bala ineh na matu. Kali' rungen medueh na maté. ⁵Iamo' Tuhan Allah nepebala kudeng ineh, ngaceku leh kali' kareb medueh kuman ineh, match medueh mukab, idi medueh mangun mepad kudeng Allah pad kali' luk do' idi luk dat."

6 Idi decur ineh nenier lawa ineh do' siren matchneh, idi bua'neh pana' do' én sirennéh. Idi ieh nengerawé ineh mangun ku luk do' kuanneh lek, pad ieh mileh. Idi ieh nengalap bua' ineh, idi nekuman ineh. Idi ieh nenguit kuan awanneh, idi awanneh pana' nekuman teh. ⁷Idi petacu match didueh mukab idi didueh nekali' didueh lubpa. Idi didueh nerut don gita' mangun ku abpar didueh.

8 Idi didueh neninger gara Tuhan Allah nalan bang kabun kareb malem, idi deléi dengan decur ineh pana' nesigapung nan

apet kabun ineh. ⁹Idi Tuhan Allah nenawar deléi ineh, kebalaNeh, "Iapehké iko?"

10 Idi kebala deléi ineh, "Ui neninger garaMu bang kabun, idi ui matot, ngaceku ui lubpa, ineh punneh ui sigapung."

11 Idi Allah nepebala, "Idéké nemarké kali namu ratnan iko lubpa? Pangehké iko nekuman bua' luk bibpengKu na miak kenen?"

12 Idi kebala deléi ineh, "Decur luk pangeh biréMu negku ineh, ieh luk nemarké bua' ineh kinanku."

13 Idi kebala Tuhan Allah nan decur ineh, "Anunké luk pangeh inau' mu ineh?"

Idi kebala decur ineh, "Meni-peh nenaluk negku idi ui nekuman ineh."

Allah Maré Ukum

14 Idi kebala Tuhan Allah nan meni-peh ineh, "Ngaceku iko pangeh nenganau' luk kudeng ineh, iko sebuleng ngalap kediman. Idi dengan batekmu iko miak suloi, idi iko miak kuman abuh tana' seruked ulunmu. ¹⁵Idi Ui nganau' aceh bunu' arangmu dengan decur ineh, idi arang inulmu dengan inulneh. Idi leh miak ngeradu' uluhmu, idi iko miak nicuk tumidNeh."

16 Idi kebala Tuhan nan decur ineh, "Ui miak ngula' derehmu kareb iko mali', idi dengan derehmu iko miak nenganak, idi teh iko gegerang ku awanmu, idi ieh pana' pa luunmu."

17 Idi kebala Allah nan deléi ineh, "Ngaceku iko pangeh neninger bala awanmu, idi nekuman bua' ineh luk pangeh bibpengKu na miak kenen, idi tana' ini uen ngediman ngaceku iko. Idi dengan me-

dereh iko nakap akan rat bang tana' ini seruked ulunmu. ¹⁸Idi tana' ineh miak ngulun tabpa' idi uduh luk baken kuanmu. Idi irin-irin luk bang pulung mangun ku akanmu. ¹⁹Idi dengan panamu iko ngakem, idi teh iko miak ngalap akan, pad macing iko lemubed amé' ku tana' teh, ngaceku ratnan abuh tana' iko ilap, idi iko lemubed mangun ku abuh teh."

20 Idi Adam neneten awanneh ineh Hawa, ngaceku ieh luk tinan amung-amung lemulun. ²¹Idi Tuhan Allah nengnanau' kuan Adam idi awanneh ayung ratnan kubil pung, idi leh nengayung nedi-dueh.

Adam Idi Hawa Tila' Rat Bang Kabun

22 Idi kebala Tuhan Allah, "Nekini lemulun ini pangéh mangun mepad kudeng Tau, ngaceku ieh kali' do' idi dat. Idi na miak kuman bua' ratnan lawa kayuh ulun ineh idi na ieh mulun ruked-ruked." ²³Idi Tuhan Allah nengecuk neneh remuat rat bang Kabun Eden, pelé ieh luk pinudut ratnan tana' miak ngasa' tana' teh. ²⁴Idi leh nengnanau' tuda'-tuda' melaikat karub pa busat aco Kabun Eden ineh. Idi leh nengnanau' sebuleng pelapet luk mebudung idi luk mediper, luk ku matar dalan amé' lawa kayuh ulun ineh.

Bala Luk Do'

Lun Bawang Bible 053P

© Bible Society of Singapore, Malaysia & Brunei 1982
BSSMB 1982 First Edition 9M